

ALELA NYA PA DAKO MA LAD OBO



Ikare mo yam con, dako ma ladobo onywalo nyare maleng,
maber dok mwonya mada. Kicako nyinge ni Alela. Awobe ki coo
ducu gu maro Alela mada. Ngat acel acel mito ni omyero obed
dako ne.




Kit ma Alela aye
nongo konyo
mine ki tic ma
i gang ducu,
cwinny mine
pe omaro ni
omyero ki nyom
nyare woko.

Inino mo acel min Alela oketo nyare piny, ci openye ni,
"Pingo awobe ki coo gi woto gang kany teretere?"
En ogamo ni, "Jo ma ineno gibino kany teretere ni gi mito an."



I nino mo dong, min
Alela owaco ki nyare
ni, "an abiceto i poto,
aloro wii woko i ot. Ka
ngat mo ongole kany
ci openyo ka dano tye
gang, pe i gam doge.
I winyo loka ma awaci
ni?"




Laco mo kara owinyo
kit ma min Alela ciko ki
nyare kwede ci ongolo
ryeko ma lamal.

Ma min Alela ocito i
poto, laco ni ongolo
dogola woko ci
okwanyo Alela ki i ot,
oceto kwede woko.

Min Alela ikare ma odwogo ki i potone, onongo dogola ki ngolo
woko, ci ocaoko dange ki nying nyare ni,
"Alela Alela in itye kwene Latina?"

Olwongo nyare kwe, pe ogamo doge ci odonyo i ot onongo nyare peke. Lok man omiyo cwer cwiny ki min Alela, ocako wer kun lubu kor obot tyen nyare ki pa ngat ma okwanyo nyare ni. Wer man woto kiman


**Alela, Alela dong twere ku
Alela kadi ikan iot.
Ot bene twere ku.
Kadi ikan Alela idero.
Dere bene twere ku
Piny ni jigi jigi jigi
Dong twere ku.**



Min Alela olore,kun ngile angila,nio ka omako nyare ma tye ka wot gin ki laco ni. Min Alela okwanyo nyare odwogo kwede i gange.

I nino me aryo ne, min Alela okano nyare i bur matut, oumo wii bur ki lum ci ocito i poto kun tamo ni ngat mo pe twero nongo ne.

Kare ma mine cito i poto, dok ocike ni, "Ka iye dog ngati mo ma tye ka lwongi ci bikwanyo woko weko adong ki cana, pien nyig cinga wa ki nyig tyena ducu ongun woko. Ngat mo pe ma bikonya."



Ma min Alela pud okato akata, won
lela mo otuc ci ocako lwongo Alela
ki dwon ma mit ni; "Alela Alela itye
kwene?"

Alela kong oling pe ogamo doge.


Ento lacen ogamo ni,
"An aene, maa okana woko i bur."



Laco ni tek winyo dwon Alela
okwanye woko ki i bur oyot,
okete ite lela ci ongweco
kwede woko madwir.

Ikare ma mine odwogo ki i
poto, onongo ni nyare peke ci
ocako wer ni;

**Alela Alela, dong twere ku
Alela kadi ikan iot
Ot bene twere ku
Kadi ikan Alela i bur
Bur bene twere ku
Kadi ikna Alela i dero
Dero bene twere ku
Piny ni jigi jigi jigi
Dong twere ku.**




Min Alela cako ngile,ki lore me lubo kor nyare gin ki laco ma okwanyo ni nio ka onongo gi. Omayo nyare odok kwede paco.

I nino me adeke, olwongo nyare dok aye ka owace ni,
"It i dero"

Alela oito i dero ci mine ocike matek ni pe onwo gin ma en otimo kiryo ni. Min Alela oloro wiye idero ka ocalo wot me cito i potu.

Laco mo ma
lalonyo dok
obino ki motoka
ci olwongo Alela
wany aryo, "Alela,
Alela itye kwene?"
Alela ogamo dog
laconi ni,

"An atye kany, maa okana woko i dero."



Lalonyoni okwanyo Alela ki i dero, oketo i motoka ne ci oringo kwede woko madwir.

Ikare ma min Alela odwogo, onongo wii dero tye i ngom.


Olwongo nyare kwe ci opoto ki koko ni,

“Man nyara tin dok ocito woko ki laco mukene?”

Ocako goyo oduru kun waci,

“Uk, uk, uk, nyara tin dong ocito woko wa kwene ka?”

Ocako wer, ki lore matek nio ka omako Alela gin ki won mutoka ni, omayo nyare oloke odok kwede paco.



I nino me angwene, dok oketo nyare piny ka ocike matek kun wace ni pe myero dok onwo gin ma en otimo ni. Owace ni, "pe inyut kama an abikani i iye, kadi bed laco mo olwongi myero i ling mot pe i gam doge."

Inge ciko nyare, okane i dero ma kilwongo ni dula, ka dong ocito i tice ma jwi ni i poto.

Ma peya okato kare malac laco mo ma won dege otuc ki malo, opye piny, okati woko ci ocako lwongo.

“Alela Alela, itye kwene?”


Piny oling ni tik.

Dok olwongo aye ni, “Alela itye kwene mono?”


Alela ogamo ni, “An aen, maa okana woko i dero dula.”

Won dege okwanyo Alela woko ki i dero dula, oroyo i dege ci otuk woko.


Ki gum marac, i cawa eno ni aye onongo min Alela dong tye ka donyo i dog dye kale.



Oono
ka dege
dong tware
atwara ki
nyare ci
ocako goyo
oduru ki
koko matek.




Ento pe omede ki laro
nyare nio ka en oto
woko ki cwe cwiny.



Pwony:

Man pwonyo wa ni; winyo lok ber, omyero ibed latin ma winyo dog luyodone.



ALELA NYA PA DAKO MA LAD OBO



Produced by
Literacy & Adult Basic Education

With Financial Support from DFID and Oxfam Novib

READERS' BOOK

Written by:
Acayo Clara
P2 Teacher Palenga P/S

Literacy and Adult Basic Education (LABE)

Plot 18 Tagore Crescent, Kamwokya,
P.O. Box 16176, Kampala, Uganda.
Tel: +256-414-532116, Fax: +256-414-534864,
Email: labe@africaonline.co.ug